

02/05/1999

Penentang tidak dipecat

Ahmad Zaini Kamaruzzaman; Hassan Omar

JITRA: Datuk Seri Dr Mahathir Mohamad berkata, kerajaan tidak bercadang memecat kakitangan kerajaan yang menentang kerajaan dan menyokong pembangkang, sebaliknya menangkis hujah kritikan mereka terhadap kerajaan.

Perdana Menteri berkata, adalah tidak wajar mereka disingkirkan kerana mereka akan menjadi lebih marah dan terus menentang kerajaan serta tidak mengundi parti kerajaan.

Bagaimanapun, menurutnya, ahli Umno tidak boleh hanya mengharapkan kerajaan mengambil tindakan terhadap kakitangan yang menentang kerajaan, sebaliknya perlu berani berhujah dengan mereka.

Katanya, ahli Umno tidak boleh bersikap sambil lewa terhadap kakitangan kerajaan yang menyerang dan mencemuh kerajaan berikutan ketiadahpuasan hati terhadap keputusan kerajaan.

Beliau berkata, jika ahli Umno hanya mengharapkan kerajaan mematahkan serangan terbabit, Umno sebagai tunjang parti pemerintah di negara ini akan lemah dan hancur.

"Sebagai parti yang menguasai kerajaan, tidak bermakna pegawai kerajaan yang buat salah, kita pecat. Tetapi kita boleh berhujah dengan mereka.

"Ahli Umno harus sanggup berhujah. Jangan fikir kita ada kuasa kerajaan, kita tidak perlu berhujah dan pecat mereka. Mereka ada hak mengundi dan akan lawan kita," katanya ketika menggulung perbahasan persidangan perwakilan Umno bahagian Kubang Pasu, di Dewan Jitra, di sini semalam.

Dr Mahathir berkata, kerajaan mempunyai pengalaman berhadapan dengan kakitangan yang sering mengkritik dan menentang kerajaan di Langkawi suatu ketika dahulu.

Menurutnya, Langkawi ketika itu bersih daripada golongan yang sering menentang usaha kerajaan tetapi apabila guru di tanah besar Kedah yang dikenal pasti terbabit dalam usaha menentang kerajaan dipindahkan ke pulau itu, Langkawi mula tercemar.

"Dahulu, Langkawi elok. Kita tukar guru yang menentang kerajaan dari tanah besar ke Langkawi... Langkawi jadi busuk.

"Apabila pilihan raya, mereka kerja lebih kuat. Manusia apabila marah, mereka bertungkus-lumus, kerja siang malam untuk lepaskan geram.

"Ahli umno tidak boleh biarkan hanya kerajaan yang buat. Lama-kelamaan, kita tewas," katanya.

Menjawab isu getah, Dr Mahathir berkata, kerajaan akan memberi perhatian serius terhadap masalah kejatuhan harga getah bagi membantu mengurangkan beban hidup pekebun kecil getah.

Katanya, beliau sendiri akan memberikan perhatian mengenai perkara itu berikutan banyak rungutan di kalangan pekebun kecil terhadap harga komoditi itu.

Bagaimanapun, katanya, kejatuhan harga getah yang membebankan pekebun kecil tidak seharusnya dijadikan landasan politik parti pembangkang, terutama Pas bagi meraih sokongan golongan terbabit.

(END)